

Lesley Griffiths AS

Gweinidog yr Amgylchedd, Ynni a Materion Gwledig

23 Mawrth 2021

Annwyl Lesley,

### **Bil Lles Anifeiliaid (Dedfrydu) Llywodraeth y DU**

Rwy'n ysgrifennu i dynnu eich sylw at ein hadroddiad ar Femorandwm Cydsyniad Deddfwriaethol Llywodraeth Cymru ar y Bil Lles Anifeiliaid (Dedfrydu), yr ydym wedi'i osod heddiw.

Fel y gwyddoch, fe wnaethom ni fynegi pryderon yn ystod y Pumed Senedd ynghylch i ba raddau y mae Llywodraeth Cymru wedi bod yn cynnig bod Senedd y DU a Llywodraeth y DU yn deddfu mewn meysydd datganoledig. Mae paragraffau 21 i 23 ein hadroddiad yn codi'r pryderon hyn unwaith eto. Mae'n arbennig o siomedig bod cydsyniad yn cael ei geisio ar ddiwedd y Senedd ar gyfer Bil dau gymal mewn maes polisi y mae Llywodraeth Cymru yn ei ystyried yn flaenoriaeth. Fel y nodwn yn yr adroddiad, gan na na fydd cynnig cydsyniad yn cael ei gyflwyno mewn perthynas â'r Bil cyn y toriad a'r diddymiad, mae hwn yn fater a all ddod gerbron y Chweched Senedd os bydd Llywodraeth Cymru nesaf yn bwrw ymlaen fel hyn.

Rydym wedi bod yn ystyried ein holl waith craffu at ddibenion ein Hadroddiad Gwaddol. Wrth wneud hynny, rydym yn nodi ein bod yn aml wedi gorfod mynegi'r pryderon hyn ar faterion yn eich portffolio.

Mae'r dadleuon rydych chi wedi'u cyflwyno o blaid deddfu gan Senedd y DU a Llywodraeth y DU mewn meysydd datganoledig yn aml wedi canolbwyntio ar faterion eglurder a hygyrchedd y gyfraith neu sicrhau cydnawsedd â pholisi yn Lloegr. Dadleuon yw'r rhain o blaid peidio â dal pwerau yn y maes hwn o gwbl ac, yn ein barn ni, nid oes rhinwedd iddynt.

Rydym yn pryderu am yr effaith gronol sylweddol a niweidiol yn sgil penderfyniadau olynol, sy'n golygu bod Senedd y DU a Llywodraeth y DU bellach yn deddfu'n helaeth ar faterion datganoledig yn eich portffolio.



**Senedd Cymru**

Bae Caerdydd, Caerdydd, CF99 1SN

SeneddDCC@senedd.cymru

0300 200 6565

**Welsh Parliament**

Cardiff Bay, Cardiff, CF99 1SN

SeneddLJC@senedd.wales

0300 200 6565

Bydd ein Hadroddiad Gwaddol yn tynnu sylw at y materion hyn a byddwn yn annog y Pwyllgor sy'n ein holynu i fonitro'r defnydd o'r dull deddfwriaethol hwn yn y Senedd nesaf.

Yn gywir,



**Mick Antoniw AS**

Cadeirydd y Pwyllgor Deddfwriaeth, Cyfiawnder a'r Cyfansoddiad

Croesewir gohebiaeth yn Gymraeg neu Saesneg.  
We welcome correspondence in Welsh or English.

